

Tro drwy diroedd amaethyddol braf ac ar hyd y glannau lle mae bywyd gwylt yr arfordir ar ei orau, yn rhan o Ardal o Harddwch Naturiol Eithriadol Llŷn (AHNE).

## Manylion y daith

**Amcan o hyd:** 10.4 km/6.5 milltir.

**Amcan o'r amser:** 3.5 awr.

**Map AO:** graddfa 1:25 000 Explorer 253.

**Man cychwyn/gorffen:** Ochr ffordd pentref Edern, SH277 398.

## Mynediad a chyfleusterau

**Parcio:** Digon o le parcio ar ochr y ffordd yn y pentref, LL53 8YP.

**Bws:** Gweler gwasanaeth Bws Arfordir Llŷn: 01758 721 777; oddrwsiddrws@yahoo.co.uk

**Toiledau:** Mae rhai toiledau cymunedol ar gael ger y traeth ym Mhorth Dinllaen.

**Lluniaeth:** Nodwch oriau agor Tafarn Tŷ Coch, Caffi Fferm Porth Dinllaen; Tafarn y Ship yn Edern, a Woodlands ar y cyrion.

## Nodwch

- Braslun yw'r map hwn. Argymhellir defnyddio'r **map AO uchod**.
- Cofier gadw at y Còd Cefn Gwlad:  
**Parchwch, Diogelwch, Mwynhewch**  
[naturalresources.wales/media/3598/cod-cefn-gwlad.pdf](http://naturalresources.wales/media/3598/cod-cefn-gwlad.pdf)

# 7 Cylchdaith Eder



## Mannau o ddiddordeb

Yn yr **Hen Felin** ① wrth afon Geirch yng ngwaelod y pentref y byddai J. Glyn Davies, awdur caneuon Fflat Huw Puw ac eraill, yn arfer treulio'i wyliau gyda'i deulu. Cafodd y cyfnodau hynny ddylanwad mawr ar y bardd a'r cyfansoddwr.

Mae'r cwrs golff ar benrhyn **Porth Dinllaen** ②. Enw hen gwmwd yn Llŷn yw Dinllaen. Mae porthladd a bae Porth Dinllaen yn un o lecynnau harddaf Cymru. Bu'n harbwr diogel i longau yn yr hen ddyddiau a chafodd ei ystyried fel lleoliad prif borthladd i Iwerddon yn nechrau'r 19<sup>eg</sup> ganrif, cyn codi pontydd Menai. Mae nifer o bysgotwyr yn gwneud bywoliaeth yn y borth o hyd ac mae cwch achub pwysig yno.

Ym Mhorth Dinllaen y sefydlwyd y **Bad Achub** cyntaf yng Nghymru ac agorwyd adeilad newydd i gartrefu'r gwasanaeth yno ③. Erbyn canol y 19<sup>eg</sup> ganrif, roedd bron i fil o longau'n galw heibio'r bae yn flynyddol, amryw ohonynt yn cysgodi rhag stormydd Môr Iwerddon. Roedd yn anochel bod damweiniau a llongddylliadau yn digwydd yn gyson yno a chodwyd cwt i gwch achub yno yn 1864.

Mae pentref **Porth Dinllaen** bellach yn eiddo i'r Ymddiriedolaeth Genedlaethol a fuddsoddodd yn helaeth yn harddwch y llecyn rai blynyddoedd yn ôl drwy dynnu'r wifrau trydan i lawr a'u lleoli dan ddaear. Atyniad poblogaidd ar y traeth yw tafarn Tŷ Coch ④. Roedd y dafarn ymysg y tair tafarn uchaf pan bleidleiswyd am 'Dafarn Draeth Orau'r Byd' ym mhapur newydd y *Guardian* yn 2014.

O gilfach **Aber-geirch** ⑤ y rhedwyd cêbl teliffon i Howth yn Iwerddon, 64 milltir i ffwrdd, yn 1913.

Gorwedd **Cors Geirch** ⑥ i'r de-ddwyrain o Edern. Mae afon Geirch yn llifo drwy gors sy'n gynefin pwysig i rywogaethau prin o flodau a llystyfiant. Mae'n Warchodfa Natur ond gellir cael mynediad iddi wrth droi am Geidio oddi ar ffordd A497 Pwllheli/Nefyn (SH308 382).



## Cyfarwyddiadau'r gylchdaith

Ar ôl cerdded i lawr stryd Edern (i lawr at y bont, i gyfeiriad Morfa Nefyn), mae'r daith yn mynd â chi ar hyd llwybr ar draws caeau amaethyddol at ffordd drol. Trowch i'r dde am fferm Porth Dinllaen, i'r chwith drwy ran o'r buarth ac yna ar draws maes carafanau, ar hyd llwybr rhwng dau glawdd, ac at Faes Golff Nefyn. Ymlaen ar eich union nes cyrraedd adeilad y Clwb Golff a dilyn y lôn darnac drwy'r maes golff am bentref Porth Dinllaen. O'r traeth yno, gallwch ddilyn llwybr yr arfordir o amgylch y trwyn ac yna tua'r gorllewin – bydd yn dod â chi at gilfach ddiddorol Aber-geirch a'i phompren dros afon Geirch. Dilynwch y llwybr ar hyd ben rallt wedyn a throi am y tir ychydig uwch ben Porth Tŷ Mawr. Croesi caeau nes cyrraedd lôn darnac wledig a aiff â chi'n ôl at lôn bost Edern. Troi i'r chwith ac yn ôl at y car/safle bws.

